

নভেম্বরেই আসছে শিক্ষকের বিশেষ গণবিজ্ঞপ্তি

ইত্তেফাক ডিজিটাল ডেস্ক

প্রকাশ : ২০ অক্টোবর ২০২৫, ০১:০০



বেসরকারি শিক্ষাপ্রতিষ্ঠানে শিক্ষক নিয়োগে বিশেষ গণবিজ্ঞপ্তি আগামী নভেম্বরের প্রথমার্ধের মধ্যে প্রকাশ করা হতে পারে বলে বেসরকারি শিক্ষক নিবন্ধন ও প্রত্যয়ন কর্তৃপক্ষের (এনটিআরসিএ) সূত্রে জানা গেছে। তবে তার আগে প্রতিস্থাপনের কার্যক্রম শেষ করার কথা জানিয়েছে সংস্থাটি।

 দৈনিক ইত্তেফাকের সর্বশেষ খবর পেতে [Google News](#) অনুসরণ করুন

এনটিআরসিএ সূত্র জানায়, প্রায় ৮০০ প্রার্থীকে প্রতিস্থাপন করতে হবে। বিশেষ গণবিজ্ঞপ্তি প্রকাশ করতে টেলিটকের মাধ্যমে কত পদ শূন্য, সেই তথ্য সংগ্রহ করা হচ্ছে। এ কার্যক্রম শেষ হওয়ার পরপরই বিজ্ঞপ্তি প্রকাশ করা হবে বলে জানা গেছে।

এনটিআরসিএর এক কর্মকর্তা গণমাধ্যমকে বলেন, ‘বিশেষ গণবিজ্ঞপ্তি প্রকাশের বিষয়ে নীতিগত সিদ্ধান্ত হয়েছে। তবে কবে এ বিজ্ঞপ্তি প্রকাশ করা হবে তা এখনো চূড়ান্ত হয়নি। আমরা চেষ্টা করছি দ্রুত সময়ের মধ্যে বিজ্ঞপ্তি প্রকাশ করে মেধার ভিত্তিতে প্রার্থীদের নিয়োগ সুপারিশ করার।

জানা গেছে, ১৮তম শিক্ষক নিবন্ধনের মাধ্যমে ৬০ হাজার ৫২১ জন শিক্ষক নিবন্ধন সনদ অর্জন করেছেন। এসব প্রার্থী এবং ১৭তম নিবন্ধনের প্রার্থীদের আবেদনের পরিপ্রেক্ষিতে ষষ্ঠ গণবিজ্ঞপ্তিতে ৪১ হাজার ৬২৭ জনকে বিভিন্ন প্রতিষ্ঠানে নিয়োগ সুপারিশ করা হয়। যদিও বেসরকারি স্কুল-কলেজ, মাদরাসা ও কারিগরি প্রতিষ্ঠানে শূন্য পদের সংখ্যা রয়েছে এক লাখের বেশি।

এদিকে আগামী নভেম্বরের মধ্যে ১৮তম শিক্ষক নিবন্ধন পরীক্ষায় চূড়ান্তভাবে উত্তীর্ণ কিন্তু ষষ্ঠে সুপারিশ না পাওয়া ১৬ হাজার ২১৩ জনের নিয়োগসহ দুই দাবি জানিয়েছেন চাকরিপ্রার্থীরা।

রোববার (১৯ অক্টোবর) রাজধানীর সেগুনবাগিচায় অবস্থিত ঢাকা রিপোর্টার্স ইউনিটিতে ষষ্ঠ গণবিজ্ঞপ্তিতে সুপারিশ না পাওয়া প্রার্থী আয়োজিত দ্রুত নিয়োগের দাবিতে এক সংবাদ সম্মেলনে এই দাবি জানানো হয়।